


Broj: 01- /23  
Sarajevo: godine

PREDSTAVNIČKI DOM  
PARLAMENTARNE SKUPŠTINE  
BOSNE I HERCEGOVINE  
n/r predsjedavajućeg



PRIMLJENO: 22 - 05 - 2023			
Organizaciona jedinica	Klasifikaciona poruka	Redni broj	Broj priloga
01 -	SO-1-	1130/23	

U skladu s čl. 170. i 171. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 53/22) postavljam sljedeće

**ZASTUPNIČKA PITANJA ZA  
MINISTARSTVO ODBRANE BOSNE I HERCEGOVINE**

- Kada je i na osnovu kojeg akta Ministarstvo odbrane Bosne i Hercegovine donijelo odluku o finansiranju izgradnje Muzeja HVO-a (Vojnog muzeja) na mjestu na kojem je od 1992. do 1994. godine bio logor za Bošnjake „Heliodrom“, u kojoj je danas smještena kasarna „Stanislav Baja Kraljević“ u Mostaru?
- Da li je tačna informacija da je Ministarstvo odbrane Bosne i Hercegovine potpisalo Memorandum o razumijevanju sa Udrugom nositelja ratnih odličja HVO FBiH o rekonstrukciji zgrade kasarne „Stanislav Baja Kraljević“ u kojoj je prije 20 godina bio logor za Bošnjake? Ko je donio odluku o potpisivanju i ko je u ime Ministarstva odbrane Bosne i Hercegovine potpisao navedeni Memorandum?
- Koliko novca je planirano da se izdvoji iz Budžeta Bosne i Hercegovine za izgradnju Muzeja HVO-a u zgradu u kojoj je, kako je u presudama utvrdio Haški tribunal, od 1992. do 1994. godine bio logor za Bošnjake „Heliodrom“?
- Raspolaže li Ministarstvo odbrane informacijom koliko novca je planirano da bude izdvojeno za izgradnju istog Muzeja iz Budžeta Republike Hrvatske?
- Da li je Ministarstvo odbrane Bosne i Hercegovine u donošenju odluke konsultiralo sve zainteresirane strane, npr. udruženja logoraša čiji su članovi mučeni i bili zatočeni u logoru za Bošnjake „Heliodrom“?
- Hoće li Ministarstvo odbrane Bosne i Hercegovine poništiti raniju odluku i zaustaviti finansiranje izgradnje Muzeja HVO-a te isto tražiti od Vlade Republike Hrvatske, odnosno Ministarstva hrvatskih branitelja Republike Hrvatske?

## Obrazloženje

„Heliodrom”, nekadašnji vojni kompleks JNA u južnom dijelu Mostara, bio je zatočenički centar za Muslimane, odnosno Bošnjake od septembra 1992. do aprila 1994. godine, kako je 15. aprila 2013. godine zaključio Haški tribunal u presudi predmeta „Prlić i ostali“ (IT-04-74-T; dostupno na: <https://www.icty.org/bcs/case/prlic>).

„Heliodrom” je, prema istoj presudi, bio dio čitave mreže zatočeničkih centara koju je osnovao HVO i u zatočeništvu držao hiljade osoba muslimanske nacionalnosti, ne razlikujući civile od vojnika. Zatočenici na „Heliodromu” su brutalno mučeni, podvrgavani zlostavljanju i izuzetno teškim patnjama, a posebno teški uvjeti vladali su u samicama na Heliodromu. Osim toga, prisiljavani su da obavljaju opasne radove na liniji fronta i korišteni kao živi štit, pri čemu je jedan broj zatočenika ranjen ili poginuo u razmjeni vatre.

Haški Tribunal je u presudi „Prlić i ostali“ utvrdio da je sukob između HVO-a i Armije Republike Bosne i Hercegovine (ARBiH) u periodu od 18. novembra 1991. do aprila 1994. bio „međunarodni sukob” i da se iz „dokaza vidi da su se snage hrvatske vojske borile zajedno sa pripadnicima HVO-a protiv ABiH, a da je Republika Hrvatska vršila opštu kontrolu nad oružanim snagama i civilnim vlastima najprije Hrvatske Zajednice, a potom Hrvatske Republike Herceg-Bosne”.

A 30 godina poslije „međunarodnog sukoba“ mediji su objavili da se u zgradi „Heliodroma“, na mjestu logora i stradanja Bošnjaka, iz Budžeta Republike Hrvatske sfinansira izgradnja Muzeja HVO-a. Uz to se cinično obrazlože da se „radovi na rekonstrukciji zgrade, podignute za vrijeme Prvoga svjetskog rata, obavljaju u zakonski definiranim okvirima za zgrade kulturne baštine” te da će muzej „kroz kulturni turizam ponuditi vrijedne povijesne izloške usmjerene na obogaćivanje identiteta i pomoći da se evociraju uspomene na dane ponosa i slave”.

Nevjerovatno je i to da je planirano da se za ovu namjenu dio novca osigura iz Budžeta Bosne i Hercegovine, odnosno Ministarstva odbrane Bosne i Hercegovine.

Sve zajedno je neviđeni nastavak ponižavanja žrtava, uz višedecenjsko onemogućavanje postavljanja tabli na mjestima na kojima su 1990-tih godina bili logori za Bošnjake (u Dretelju, Gabeli, Ljubuškom, Heliodromu, logoru „Vojno”, Koštanju bolnici u Stocu itd.).

U skladu s članom 171. st. (2) Poslovnika Predstavničkog doma odgovor u pisanoj formi mora se dostaviti u roku od 30 dana od dana kada je pitanje dostavljeno onome kome je upućeno.

Zakonom o parlamentarnom nadzoru („Službeni glasnik BiH“, br. 25/18) propisane su sankcije za neodgovaranje na poslanička pitanja (član 64. stav (1.) tačka a) i b) Zakona).

S poštovanjem,

ZASTUPNICI PS BiH

Safet Kešo  
  
Semsić Mhemedović  
